

Vorarlberger Landesarchiv, Urkunde 8540

12.6.1560 Claus Ülin Tugstein

Ich Claus Ülin zu Thorenpüren unnd uff dem Tugstain gesessen Bekhenn offennlich für mich alle mein erben und nachkomen unnd thun khundt aller meniglich mit dem Brief, das ich mit wolbedachtem Synn und gut Zittiger Vorbetrachtung unnd guttem vorwissenn von Mein des bessern nutz unnd fromen wegen, Der Erwürdigen Pfrundt und gestift, der Früemess, zu Thorenbüren allen Irren Inhabern pflegern früe= mesern, verwaltern, unnd allen Iren nachkomen, umb Zwainzigkh pfund pfenig gutter genämer diz Lands werung Dero ich Vonn dem erbern, Cristan schnellen, der Zeit gedachter pfrund Inziecher, Inhaber und verwalter. Gennzlich gewert unnd bezahlt bin, und die ann meinen gutten nuz komen und gewendt. Sind, Ainsts stätten vesten unnd Ewigen Zinß unnd kouffs, Auffrecht unnd redlich zu kouffen gebenn hab In Crafft diz Briefs, ain pfund pfenig obgemelter werung, rechts stätts Järlichs unnd gewiß ewigs Zins unnd gelts von Ausser unnd ab me= inen Aigen Zway Juchart ackher auff dem Tugstain gelegen, stossend obna an Hannsen Wächinger, Zum Andern an die gmaind zum Drytten ann petter Hemen Erben, unnd ander mein aigen gut, unnd zum virnden an Bartholome Blassern, Söliche hierin verschrybne unnderpfandt sölleind mit aller Irer recht unnd gerechtigkeit, mit grund mit graut mit Steg, mit weg, und namlich mit allen ieren rechten, Davon ganz überall nichts Ausgenomen. noch hindhan gesezt, Umb bemelt Hoptgut Zinß und waß dister Brief wieset, der obgeschrybnen pfrundt allen Iren nachkomen. pfleger und verwalter, recht behafft unnderpfandt Haissen und sein Für frey Ledig und los, Auch sonst vormaln gegen meniglichem ganz unverschryben und Unbekümbert In alweg. Dennoch sollen und wellen ich all mein erben, und nachkomen. so gedachte unnderpfandt ymer Inhabern, der gedachten pfrundt unnd allen künftig Inhaber diz Briefs, das gemelt ain pfund pfenig Zinß Nun hinfüro, Järlich auch Yedes Jars allain unnd besonnder, Alweg Auf Sant Martins des Hailigen Bischofstag, gütlich richten geben und die zu Iren Sichern Handen unnd gewalt antwurten yedes Jars one verzug, Unnd namlich one allen ieren Costen unnd schaden, Danen welches Jars ich oder meine erben. Hierin Sümig wurden, unnd disen Zinß nit richten unnd geben, Inn alle wieß und maß wie obstaut. So seind unnd Haissend diz hierin verschybenen unnderpfandt mit aller ierer Zugehörd Zinsfellig unnd zu rechtem ewigen Aigen gefallen unnd verfallenn, der gedachten pfrundt allen Iren nachkomen. Inhabern und verwaltern, Also das sie Es fürrohin ewigklich sölleind unnd mögeind Inhabern buwen, nuzen, niesen, versezzen, verkouffen, unnd damit schaffen handeln thun unnd Lassen, Als mit Anderm derpfrund aigen gut. one mein und meiner erben, noch meniglich von unnsern wegen Sumen noch Irren weder mit noch one gericht Gaistlich noch weltlich Indhain weiß noch weg, Unnd hieruff solleind und wellind ich alle mein erben und nachkomen umb Hoptgut unnd diz Zinß unnd kouffs, Ewigklich Ir recht werren haissen und sein, für all abgenng Irrung und Infäll und alle Ansproch Inen die nach Lanndsrecht, unnd nach allen rechtenn Zuvertretten unnd Zuversprechen. gegen meniglichem wo sie des Immer bedurffennd, genzlich one allen Iren Costen mangel abgangg unnd schaden. Wie woll dister Brief, ain Ewigen kouff Inhelt yedoch ist mir dannocht die gnad beschechen das ich alle mein erben, unnd nachkomen, disen Zinß wol widerkauffen unnd ablössen mügen, Nun hinfüro welches Jars wir wellen doch alweg mit dem Hoptgut, darumb er erkaufft ist und mit den erloffnen unnd unbezalten Zinsen unnd mit guter Münz unnd Lanzwerung, alles one geverde. Unnd des alles Zu waren vesten offem Urkhundt So han ich ob genannter Claus Ülin, mit Vleis und Ernst erpetten den Ersamen Jacoben Böschenn den man nempt Köföll, der Zeit Amann Zu Thorenpüren das er sein Aigen Insigel offennlich gehenckt hatt an disen Brief für mich und alle mein erben. und nachkomen, Doch Ime unnd seinen erben In alweg one schaden, der geben ist An unnsers Herrn Fronlichnams abend nach Cristi gepurt thusend fünffhundert unnd darnach In dem Sechzigisten Jahre.

Rückseite:

Zinsbrief von Claus Ülin p. 1Ibd

Dieser Brief ist noch umb 10... zum obigen in Kräften gestellt worden

1560 Juni 12.